

Tindakan boleh cetus prasangka antara kaum

Um- 17/10/2006

KUALA LUMPUR 16 Okt. - Tindakan Presiden Gerakan, Datuk Seri Dr. Lim Keng Yaik yang mempersoalkan pegangan ekuiti mengikut kaum disifatkan sebagai 'menyimbah minyak ke atas api yang merebak dalam sekam'.

Menteri Penerangan, Datuk Zainuddin Maidin berkata, ini kerana ia boleh memburukkan lagi perasaan prasangka antara kaum di negara ini.

Beliau berkata, kenyataan Keng Yaik itu tidak sepatutnya ditimbulkan kerana ia tidak membantu menghapuskan sifat prejudis di kalangan masyarakat Cina.

Malah, katanya, tindakan Keng Yaik itu turut menampilkan satu sindiran yang hanya akan menambahkan lagi keraguan dan ketelusan kerajaan didokongi beliau sendiri.

"Keng Yaik tidak membantu membetulkan perasaan prasangka masyarakat Cina khususnya golongan muda yang tidak memahami sejarah, konsensus dan formula dipersetujui bersama pemimpin-pemimpin kaum sejak awal kemerdekaan negara ini.

"Keng Yaik mengemukakan alasan di sebalik penyelesaian akademik berhubung kajian oleh Institut Kajian Strategik dan Antarabangsa Asia (ASLI) mengenai pemilikan ekuiti bumiputera sebanyak 45 peratus.

"Bagaimanapun, orang Melayu mudah memahaminya serta melihat ia sebagai sindiran terhadap kerajaan yang tidak jujur, tidak telus dalam mengemuka-

kan penurunan ekuiti bumiputera sebelum ini," katanya dalam satu kenyataan yang dikeluarkan di sini, hari ini.

Beliau berkata demikian sebagai mengulas amaran Timbalan Perdana Menteri, Datuk Seri Najib Tun Razak terhadap pihak-pihak tertentu yang cuba menyindir kerajaan dan memberi gambaran seolah-olah kerajaan tidak telus dalam isu ekuiti antara kaum di negara ini.

Ingatan itu diberikan ekoran gesaan Parti Gerakan yang mahukan Unit Perancang Ekonomi (EPU) mendedahkan secara telus kaedah kajian merekodkan bahawa penguasaan bumiputera dalam ekuiti ekonomi negara hanya sebanyak 18.9 peratus.

Gesaan itu dibuat berikutan pemimpin parti itu merasakan ada sesuatu tidak kena dengan angka tersebut kerana tidak menampilkan sebarang peningkatan berterusan sejak Dasar Ekonomi Baru (DEB) diperkenalkan pada 1970.

Bagaimanapun, Najib menjelaskan apa sahaja angka yang digunakan dalam kajian itu adalah untuk kepentingan negara secara keseluruhan dan bukannya telah diubah suai untuk kepentingan mana-mana masyarakat.

Dalam pada itu, Zainuddin memberitahu, dasar keterbukaan dan ketelusan diamalkan oleh Perdana Menteri, Datuk Seri Abdullah Ahmad Badawi selama ini bermaksud semua kaum perlu mempersetujui prinsip bersama-sama bagi memelihara keamanan serta kemakmuran negara.